



Charro Kelly a fayece dialuna mainta



ORANJESTAD (AAN): Dialuna mainta e informacion tristo a drenta, cu e conocido politico, ex-miembro di Eilandsraad, ex-Diputado, ex-Ministro, y ex-Parlamentario, esta Pedro Pablo Kelly conoci como 'Charro', a fayece.

Conoci como un di e politiconan cu semper ta para pa su creencia, semper ta double-check cualkier informacion prome cu e divulga esaki, y na numeroso ocasion tabata ricibi admiracion di publico ora cu tabata acerc'e pa asina pidi yudanza pa nan barío of distrito.

Naci dia 19 di October 1941 na Aruba, Charro Kelly a drenta arena politico ora cu el a bay riba lista di Partido MEP y rapidamente a crece den voto. E tabata comparti ideologia di lider Betico Croes y tambe

tabata busca forma pa libera Aruba for di e trato desigual cu e isla aki tabata sufriendo di dje na man di Curacao mientras cu tabata den Constelacion Antiyano.

Charro Kelly a fungi como Diputado den Gobierno Insular di Aruba pa Partido MEP. Y ademas durante e reunionnan importante den segundo parti di decada di 1970, e tambe a forma parti di e delegacion di Gobierno cu a bay reuni na Den Haag pa papia riba e futuro estructura estatal di Aruba. Asina a forma un delegacion amplio di no djis politico, sino tambe gremionan comercial y sindicato, cu na September 1977 a sali pa Hulanda. Charro Kelly tambe tabata den e delegacion aki.

Sinembargo e relacion cu

Partido Geel no a sigui sin friccion, y pa eleccion di 1985, el a forma su partido di Accion Democratico Nacional (ADN), y el a bay forma un Gobierno di Coalicion hunto cu Partido AVP, Partido PPA, y Partido PDA. Gobierno nobo a cumenza traha dia 1 di Januari 1986 ora cu Aruba a drenta su Status Aparte oficialmente, y Ministro Charro Kelly a haya e cartera di Obranan Publico y Companianan di Utilidad.

Bao di su maneho den Obras Publicas, el a enfoca riba e.o. embeyecimento di Waterfront na Playa, y tambe a traha riba e realizacion di e proyecto di Sasakiweg cu a bira realidad den di dos mitar di decada di 1980.

E tabata esun cu a aproba tambe den mesun segundo mi-

tar di decada di 1980 pa construccion di e.o. Costa Linda Beach Resort, como tambe Divi Phoenix Beach Resort, Hyatt Regency Aruba, y tambe e plan pa construi Prison di KIA na Santo di Patia na San Nicolas. Prome cu 1990 a yega, ya caba e Prison a keda cla.

Algo cu Charro Kelly a bira hopi famoso pe, ta cu el a djis fada di mira cu hopi caminda rond di Aruba e tempo ey ainda ta sufri di caminda di tera. Mientras cu casi nunca DOW tabata pone prioridad pa duna e barionan abandona aki cu asfalt, principalmente den distrito di Noord.

Di e forma ey el a start un campaña unda el a bin cu un plan masivo pa na un forma mas economico, e por basha

asfalt riba varios ruta, sin cu tin di haci e trabao extenso di traha un 'fundeshi' solido prome bao di dje. Resultado di esey ta cu hopi area porfin a bin haya caminda di asfalt.

Partido ADN y Charro Kelly tabatin bon acogida den distrito di Noord, y e tabata algo cu a yuda e partido sigui haya sosten di pueblo.

Ultimo temponan, Charro Kelly a confronta problemanan di salud y tabata na cas cerca su famia na Tanki Leendert, y rondona pa su nieto- y nietanan. E tabata usa un rolstul pa movilidad.

Dialuna mainta na edad di 79 aña, el a fayece. Na su dos yiunan y demas famia, DIARIO ta expresa su mas profundo palabra di condolencia.